

**Japaun Apoia Reutilizasaun Kareta Bombeiros Segunda-mão ba Autoridade
Protesaun Sivil iha Lautém no Díli.**

12 Fevereiro, 2025

Iha loron 12 fulan-Fevereiro tinan 2025, serimónia asinatura kontratu ba assisténsia subvensaun ba Projetu Reutilizasaun Kareta Bombeiros Segunda-mão ni'an iha Munisípiu Lautém no Díli, hala'o iha Embaixada Japaun ni'an iha Timor-Leste. Assisténsia ne'e fornese liuhosi Japaun nia eskema assisténsia Dezenvolvimentu "Subvensaun Assisténsia ba Projetu Seguransa Umanu iha Baze (GGP).

Kontratu ne'e asina entre S.E. Sr. KIMURA Tetsuya, Embaixadór Japaun ni'an iha Timor-Leste, no representante sira hosi Autoridade Protesaun Sivil, implementadór ba projetu refere. S.E. Sr. Domingos Mariano Reis, Sekretariu Estadu ba Protesaun Sivil, S.E. Sr. Mélio de Jesus, Prezidente Autoridade Munisipál Lautém no lideransa komunitária sira partisipa serimónia refere.

Autoridade Protesaun Sivil sei simu Reutilizasaun Kareta Bombeiros Segunda-mão ba Munisípiu Lautém no Díli, ho kustu montante finansiamentu \$ 333,987, hosi Governu Japaun. Liuhosi nia eskema assisténsia Dezenvolvimentu, Grant Assistance for Grassroots Human Security Projects (GGP), Governu Japaun fornese ona kareta Bombeiros hamutuk 9 iha pasadu. Iha tempu ida ne'e, planeia atu fornese kareta Bombeiros 2 ho bomba, kareta tanke, kareta ho eskada no kareta tanki ba bee-hemu.

Embaixadór Kimura hateten katak *"Embaixada Japaun durante ne'e servisu besik ho Autoridade Protesaun Sivil, CPA, ne'ebé responsabiliza diretamente ba protesaun seguransa no sira nia subsistensia povu iha Timor-Leste. Há'u hein katak insidente ka dezastré sira relasiona ho inséndiu sei la mosu, maibé karik akontese, favór uza ho efisiensia kareta Bombeiros ne'ebé fornese liuhosi projetu ne'ebé asina ohin hodi salva ema no sira-nia sasán. Ha'u hakarak hateten katak ami sei kontinua koopera ho CPA no povu Timor-Leste iha resposta emerjénsia no redusaun risku dezastré liuhosi fahe ami-nia esperiénsia no kuñesimentu"*.

Governu Japaun durante ne'e hala'o ho ativu projetu lubuk ida iha Timor-Leste, hahú hosi Dezenvolvimentu infraestrutura ho eskala boot no apoiu industrial to'o projetu ho eskala ki'ik ne'ebé fô benefísiu diretamente ba comunidade sira. (Remata)